

射
鷹
樓
詩
話

射鷹樓詩話卷十二

侯官林昌彝惠常輯

山陰胡雲持副貢

天游

著有石筍山房集

榜姓方浙江北直兩中副榜見越風

天游有異才於書無所不窺乾隆初舉博學鴻儒天游以

副貢應

詔四方文士雲集每稠人廣座天游輒數千言

落紙如飛文成輿博見者嗟服天游於文工四六得唐燕

許二公之遺詩亦雄健有氣朱梅崖文集一統志成當進

御鄂張相國屬表於齊檢討召南檢討因推天游鄂相國

驚歎其文欲招之檢討曰天游奇士豈可招耶卒不至居

京師十餘年名日以盛忌日以深歲辛未舉經明行修卒

爲忌者中傷而罷嘗與山西田待御懋有舊因往依之卒

於蒲州年六十三詞科掌錄稚威已酉副榜貢生禮部尙

書溧陽任公所薦其座主也藻耀高翔才名爲詞科中第一所作若文種廟銘靈濟廟碑安熙先生碑任御史趙總兵兩墓志遜國名臣贊序柯西石宕記皆天下奇作雖李文饒權載之執筆不能過也以持服不與試丁巳補考鼻血大作納卷而出小倉山房文集稚威修志太原病太守周西京來視稚威拱手曰公來甚佳別矣卽暝氣縷縷若騰烟須臾張目曰不能不再生人間爲南人乎爲北人乎公爲籌之周泣下曰南人歸南曰然遂氣絕按天游五古如女李三行七古如唐涪溪中興頌石鼓文畫桃源行漢杜陵五鳳銅行燈槃歌長篇鉅作爲時所誦五言如天隨秋在野風與日爭明人將秋共瘦詩更瘦於人七言如無數行人無數柳一分秋色一分波滿橋蛙爲官鳴時傍路蝶

忘春謝尙尋花皆渾脫可誦

本朝工駢體文者凡十一家胡稚威

天游

也洪稚存

亮吉也

孫淵如

星衍也

也孔奩軒

廣森也

也阮文達

元也

也張介侯

張皋文

惠言也

也陳恭甫先生

壽祺也

也湯茗孫

儲璠也

也吳山

尊

蘇也方彥聞

履齋也

也諸家駢體文古懋奇與沈博絕麗

大有復古之功可接黃石齋先生若陳宜年之陳舊袁簡齋之粗豪吳園茨草豈續曾冰谷吳穀人楊荔裳彭甘亭之未具大力皆不足以行遠者也

閩縣亡友家子萊孝廉

仰東

詩初學溫李後用力漢魏盛唐

一洗鉛華之習諸體中尤長七言古名篇鉅製同輩爲之退舍其讀昌黎集夢得四語遂續成之云君不見名將之馬高八尺馳驅戰坂生長風又不見鉅君之筆長三寸縱

橫藝苑凌飛虹神來直鞭太華走信到一吸滄溟空盤古
開天破鴻濛大地突起文筆峰誰其得者乃在韓文公文
公英挺具道力下筆渾灑生天工等閒讀破五千卷銀濤
赴腕紛奔洪唐音中葉漸凋瘵獨樹一幟稱詞宗上視李
與杜古劍映射光熊熊下視歐與蘇河源歸宿聲淙淙同
時郊島真兒童俗儒論詩界唐宋區別門戶欺盲聾鏤肝
銖腎困規矩往往真氣苦不充豈知君獨握神契自變初
盛開熙豐國朝茂製建安盛此筆無始亦無終我將求
之遙相從仰招明月凌蒼穹俯駕白雲攸龍宮橫乘鳥道
入蟲叢涉險不愁百怪出步虛期與羣仙同回翔元氣九
萬里躡公蒼莽大溟中李元妃妝臺歌云瓊花瑤島仙風
微完顏舊業今全非獨有妝臺廢遺址後人盛說章宗妃

妃家隴上門楣李少矜穎秀通書史傾鬢緝藻辨蟲魚敷
衽論心極名理昔年十六顏如花清歌妙舞俱名家俯仰
當筵曜華燭天風落睡翻紅牙承歡從此事游讌不知何
物陰麗華東風斜捲芙蓉幕臺上臺前盡金錯珊瑚作枕
璫瑁牀雲母爲屏水晶箔盤龍明鏡懸中央彩雲環佩鳴
丁當內子傳頰螺子黛侍兒捧進七寶香春嬌滿眼君恩
重千回萬轉方梳妝妝罷微聞天語喚君王露坐昭明觀
森沈靈璫漏聲微席地談心及夜半

妃與章京露坐上曰
二人土上坐如應日

一月日

但知有月妝臺歡豈知無月妝臺寒泰和以後春

邊明 歸去流水殘花亦怕看

嘉應李閨如

一字秋田諸生

光昭

詩真意沈鬱健筆峻嶒卓然獨

標一幟嶺南羣雅云嚴滄浪以禪喻詩有詩不關詩之說

前人嘗闢其非諸生詩禪吟一篇持論尤痛快其詩云喻
詩以禪始嚴氏作詩能令佛天喜但云水月鏡花似滄浪
且未知禪理浮光掠影下乘禪積健爲雄真種子或疑象
教主空寂大雄何以標宗旨佛生已具不凡骨勵行焚頂
還燒指九年面壁絕見聞大千雲遊豁目耳尋師渡海立
枯槎毒龍饑蛟迎角齒祇憑佛力千臂健得破禪關百重
峙亦如詞客攻詩城嘔出心肝渠乃已此後乾坤頓軒豁
大光明鏡開塵裏一莖草化丈六身火目珠眉纓絡體塵
喉百拜獅王迎金剛攔門夜叉跪琉璃宮殿七寶塔富貴
奚啻王侯擬羽葆幢幢天女招雨花四散紛紅紫旃檀初
熱震鐃鼓白虎蒼龍作人起廣施法雨潤人間四海蒼生
迴槁死誰云佛法大縹緲我見其才絕雄偉俱由苦海浮

航來盆火栽蓮蓮結蕊世人爭取詩喻禪曰非關學言非
是片時妙悟生風旛露電流光甯久恃天聲風雷人嘯歌
天色雲霞詩藻采波瀾壯濶氣崢嶸化爲崇山兼大海觀
其下筆如有神豈識鐵研遍圖史卽詩卽佛妙從心爲苦
爲甘難告爾十年孤立擢胃腸一日長歌泣神鬼諸生更
有賣蔗童子歌一詩沈痛之語亦沁人骨髓小引云天啟
璫禍李侍御應昇就逮緹騎汹汹士民憤擊一賣蔗童子
提削蔗刀從一肥尉後嚮其肉餉狗惜史書不傳其事李
子爲作是歌云童子昂藏無七尺蔗刀氣忽干霄白甘蔗
尖時變黃蘗虎喉遍地求人食李家侍御江南傑陷入囚
車驅道側萬人聯雲呼殺賊諸尉褫魂竄荆棘童子尾隨
一尉行砮然奏刀驚霹靂片肉擲地含羶腥狗尙遲疑不

欲吃此童此事足千秋國史無傳野史得五人墓道薦馨香誰配童祠供血食

順德黎二樵山人

簡

詩峻拔清峭刻意新穎劇目怵心擾擾

獨造聽松廬文鈔謂山人生平擅詩書畫三絕其詩由山谷入杜而取鍊於大謝取勁於昌黎取幽於長吉取豔於玉溪取瘦於東野取僻於閩仙錘焉鑿焉雕焉琢焉於是以成其爲二樵之詩聽松廬詩話云二樵先生詩甘苦得失自知之自言之其答同學云簡也於爲詩刻意軋新響當其跨步時語亦頗倜儻又與人論詩云士生古人後詎有不踐迹始則傍門戶終自豎梁戟裨校轉渠帥揮叱赴巨敵一身數生死百戰資學識絕頂無坦步高唱有裂筍彎弓石爲肉磨刀水先赤要於其發端真氣貫虹霓誦此

數言可以知先生之詩矣又云詩人望我我方閉門薜蘿
幽深外有白雲此二樵山人詩也而余每於塵勞中誦此
如一服清涼散又有句云清宵悠悠撫我鳴琴孰聽其曲
自惜其心自惜其心四字道盡千古文人心事又云二樵
詩好奇以七古論之有清奇者如湖上秋光闊無著約束
結成明月團有雄奇者如刀色抱人不見人人乃聲出刀
中央有瑰奇者如黃昏碧火行木客陰洞雄狐拜金馬有
幽奇者如長狐嘯血成碧苔一絲冷夢尋不回語皆匪夷
所思又云二樵詩多單句可味者五言如情真使人醉又
積愛成至愚又孤心入萬象又天氣夜中分七言如秋氣
誰先先與雲又吟詠氣平心有悔又一官纔罷百骸尊又
漸減聰明願息機又賣文隨力飯饑人若此者皆耐尋緝

又云粵東黃梅天氣牆壁多出水二樵句云南風古牆汗
又云南霧萬物濕語樸而鍊又云二樵七律多幽新僻雋
之作然亦沈著者如牂牁一首云天上牂牁屬要津穀絲
唇齒互相因猶聞重譯輸華夏何至堅關閉晉秦白虎壇
臺勞大吏白燐風雨待耆民雲頭幾夜巉巖黑可洗西南
赤地塵此憂旱詩也聽松廬詩話錄之矣其尙有鉅篇可
誦者如萬戶閉秋月家家有魂夢虛無生笑啼衆幻作一
閨我知寒巖僧身倚枯木凍潛處諸妄界抱靜不敢動學
道轉述悶求悟亦冥洞孤心自迥薄千古入收縱又云海
潮入村水三折水深花深地深極故人村口隨香風小艇
衣囊濕春碧又云風長雲亦厭江闊月無依露靜叢葦白
雨多空地青眼看逝者水吾亦古之人又生如草木真爲

死士有詩書亦可貧詩句隨時成掌故饑寒行處卽殊方
吾聞十硯翁詩流傳海內 國朝名家小傳謂其豔體尤擅
場細膩溫柔感均頑豔余謂翁春思一詩絕似南宋人風
味今錄於此榻花和露落青苔鏡檻無風暗自開涼月不
知人已散殷勤猶下畫簾來

學圃詩存侯官家醇叔先生

崑瓊

著先生幼而歧嶷

乾隆乙酉鄉榜

讀書過目成誦踰冠博學工文與葉毅菴

觀國

孟瓶菴 超

然梁九山

上國

翼海峯

景瀚

諸先生共二十八人結讀書

榭與從兄開瓊春瓊同游京師先後主大興朱文正河間
紀文達二公家名噪都下時稱爲閩中大小林云令湖南
有善政尤精篆隸善別書畫所著有石林畫系二十四卷
初編一卷續編一卷詩多雅健其題蘇武牧羝圖七言長

篇稱雄宕湘江詩尤爲雅澹今錄於此十里雲烟薄似羅
涼侵白紵客初過趁潮晚市魚蝦賤近水人家雁鷺多詩
思半生楓葉酒塵心已淡藕花波卜居倘或從漁父擬向
湘江著釣簑

無實用而好談經濟者臨事恐不能濟事黃梅喻石農明經

文整

著有紅蕉山館詩鈔有句云高談遺世務必無經濟

功直闕秣有得之言明經詩多入情之作如屋角爨煙青
兒童喧晚食但期在官日無忘住家時論古應須識時務
讀書原不爲科名題范文正祠秀才天下爲憂樂老子胸
中有甲兵皆言中有物非僅詩人已也其名句可誦者如
塢雲藏鳥語春色到田家大江流霽月一雁點星霜楚水
未沈征士恨秋山還伴酒人行泉當咽處墮殘雪山忽斷

時沈碧鐘一夜西風驚客夢滿林黃葉別詩人客喜坐來
今舊雨詩如梅瘦兩三花皆卓然名句

福鼎家叙秋孝廉

滋秀

著有快軒詩集孝廉幼穎敏記誦諸

博詩多雅健七言古七言律尤氣勢雄闢題趙松雪泥金
小楷手卷反面諷刺得詩人忠厚之旨其詩云吁嗟趙吳
興在宋天潢逸匡山慟已傾文海薦何戀呶呶館閣職乃
荷仁宗眷想當延祐時承直集賢院乘暇摹黃庭裁牋當
白練回首念家山宗室漂如霞留此一握筆忍淚開消遣
自知鐘鼎非轉覺林泉善淮南招隱心一一卷中見晚泊
京口云開府名區據上游暮雲天際片帆收潮音近繞南
徐鎮嶂色遙沈北固樓澤壑魚龍腥午夜江城木葉動高
秋蘭成無限傷心賦極浦寒砧起暮愁登廣惠寺塔云衆

山如障水如襟河朔稱雄閱古今百劫墟烟連遠漠九秋
詞客獨登臨上方鈴語諸天近絕塞鴻飛木葉深回首漢
唐征戰地陘關無際夕嵐沈趙陵云山水吟哀思故鄉玉
鳥飛盡路茫茫可堪頗牧爲猿鶴誰使邯鄲入虎狼火徧
沙官巢雀墮樓空神女晚風涼年年隴上車聲咽拚與行
人弔國殤顏常山示衣坂云河北征虜沸地塵孤城倡義
仗誰人櫬棺未掃羞吾輩金紫何爲著此身九郡蝨吞殘
烈骨一門草燼化寒燐祠前莫更談天寶松檟西風易愴
神渡揚子江二首云淮海西來拓大觀江流千古淼茫開
氣蒸鼉島潮高下天淨龍堂客往還樓櫓舊通三楚國髻
鬢新染六朝山我懷宗愨長風志涉盡波濤亦等閒組練
平驪譟萬軍雪波層送鸚鵡羣石旃翻影江心合風鐸搖

空塔頂聞終古金焦戀兩眼當年吳魏定三分霸圖久歇
烽煙靖鐵甕城高起暮雲秋夜云鼓子城昏戍角催明河
如練挂牆隈茂陵病客思鄉甚卧聽秋鴻塞外來題秋林
茅舍圖云楓林茅屋傍晴溪縹緲煙雲入望逃夢到吳山
正秋色半村黃葉抹陵西皆雅健可讀

仁和徐薌圃諸生

本義

著有申椒詩草集中佳篇如擬幽州

馬客吟三首若幽燕老將氣韻沈雄今錄於此驅車黯黃
沙揮鞭淡白日古戍何蒼蒼大半幽州客朝行居庸關暮
過盧龍下枯桑挂吾鞭清泉飲吾馬雕鞍盛年客身騎五
花聽腰間金僕姑手底綠沈弓鳴鏑荒山隅解鞍古城口
槩泛紫駝羹柘酌黃梁酒大醉酒爐旁虬鬚猛如虎十三
胡姬歌十五渾脫舞

友漁齋詩集嘉善黃南薰國子生凱鈞著先生續集中有農

器詩十四首今錄其題并節其注不耕而食者觀之可以

知稼穡艱難農功辛苦焉松軒如曰錘曰耨曰犁曰耜曰

蕩曰鎌曰擔曰礮曰鐵鎔曰翻車曰臂籠曰喬扞曰稻牀

曰杵曰錘卽古之鍬也錘地以起土也耨者用以耨泥編

竹爲箕兩箕對合用長竹竿附柄附以細竹相爲啟閉犁

者利也冶金以爲之者曰犁鑿斲木而爲之者曰犁底耜

柄長四尺首闊一尺五寸列鑿方竅以齒爲節蓋犁以起

土惟深爲功耜以破塊惟細爲度蕩者用材板長二尺闊

八寸以釘排列長竹爲柄田方蒔秧尙未勻熟須用此器

蕩之使水土相和凹凸各平鎌似刀而彎長尺許刈禾麥

斫柴篠農家便之擔負禾具也礮礮穀器所以去穀皮也

鐵鑿頭廣一尺或四齒或六齒發土之具也翻車其制如槽長可二丈槽中架犀木板一道隨槽闊狹以鶴膝木聯之循環不斷岸上橫設大軸人憑架上軸轉動則水引而上矣臂籠篾竹編之農夫耘苗穿臂於內以代衣袖喬扞挂禾具也稻牀方約四尺柳栗條十數莖橫其中持稻把攢其上穀粒漏於下杵臼舂也古掘地爲臼我鄉曰多置平地列牀其後人立踏之先生寫景言情時寓至理句如八口無饑真樂事一家少病卽神仙閒情每向忙中得樂事能於澹處尋花發先呼嬌女看詩成念與老妻聽故人詩好久能記自種花開倍可憐欲了事如急性子嫵于謀似信天翁藥非自製終難信書却貪看奈健忘試看紅紙都成白安得烏鬚不變蒼老境漸來先齒髮此心自問尙

兒童

豬簪箸可除魃毒鳳尾蕉能禦火災此漢陽亡友劉芥雲學

正傳瑩

句也作者未注明所出今按吾閩叢山中多毫豬

一身盡毫能刺人曲阜桂未谷札樸云永昌順甯多毫豬能發矢射人或取其毫代箸遇毒輒作聲滇俗慣下毒惟此物能距之又按桓臺王大司馬輯火經言隨時改火人不病火症鳳尾蕉可壓火災二事足以廣見聞

閩縣謝杏根布衣

淋

著有杏夢樓詩鈔布衣夙具慧業少孤

而貧常負笈遊學吳越荆楚間煙雨孤篷詩歌弗輟詩多纏綿悲惻之音今觀其年壽不永豈非悲哀太盛耶粵江云粵江連夜夢慈幃秋老黃花客未歸曉上江樓獨回望關山滿眼白雲飛二月洪江曉發云昔日歸舟古渡頭桃

花三月下春流眼前依舊桃花水不渡歸舟去舟布衣
客吳門卒世以洪江詩爲詩識云

同安李忠毅公

長庚

勦海匪蔡牽功垂成而歿於王事儀徵

阮文達公哭忠毅公云戊辰五月辦賊至甯波爲前提督
壯烈伯李忠毅公建昭忠祠哭祭之詩云粵海聞天接燧
烽大星如斗墜殘冬一生精氣乘箕尾百戰功名稱鼎鐘
死後人知真盡命生前 帝許得崇封 至尊震悼廷臣

哭早有孤忠動

九重誰遣孫恩贖一船非公追不到南

天

公擊蔡牽於粵海暖間被炮斃後蔡牽惟贖單舸逃入安南海中

遠探蛟穴五千里苦

秣鯨波二十年隔歲過門皆不入

公連年在海不歸卽歸亦但在鎮海修船備糧

未嘗一返家署

乘潮徹夜每無眠雅之若與牢之合早見澎臺縛

水仙六載相依作弟兄節樓風雨共籌兵

元乙丑以憂去浙後總督每掣

公附致有手中曾擊千舟盜公與元所共擊滅攻散如水

前東之變下千艘海上如連萬里城絕吭原知關氣數寄牙早已斷

歸情公在洋封所落齒寄夫人誰憐伯道終無子好與恩

勤待館甥公無親子襲爵者族子也其女婿同知陳大甬

上重來特建祠舊時部曲竟依誰鈴轅月冷將軍樹甬上

寓提督虛署中泮水苔深叔子碑公建修府學會如此置身真不

恨何爲齋志也休疑麥城久合關家識彷彿英風滿廟旗

公出師時禱於甯波關帝廟占得籤詩

有云到頭不利吾家事留得聲名萬古傳

人間有事皆前定偶向羣生夢裏徵此閩縣家自求布衣景

福句也江蘇焦里堂孝廉循近代通儒也乾隆戊申鄉試

二場夢一卒持刺來視之字徑半寸許曰年愚弟章世純

是時孝廉年二十六銳於進取或曰刺字稱年今科必中

式矣乃越十有四年辛酉科始獲鄉舉孝廉年三十九始
悟章柳州亦辛酉舉人夢之奇驗無過於此然柳州終不
成進士以縣令終孝廉仕進之心亦從此澹矣

侯官黃卓人明經

漢章

著有紫雲樓詩鈔詩計萬餘首陳秋

坪先生稱其五律爲五言長城殆非虛譽余嘗愛其春暮
墨香亭書事云山花壓徑知春深黃鳥飛來啼碧林主人
日得一壺酒醉不成眠卧柳陰此詩雅有唐人逸響

曲阜顏修來考功

光敏

著有樂圃詩集康熙丁未進士余友曲阜孔

繡山舍人

憲彝

以曲阜詩鈔相贈中載考功詩頗多其詩

探源漢魏古厚雄深抗行於韞退荔裳西樵阮亭諸公之
間漁洋山人嘗謂施愚山曰吾鄉英絕當讓此人桂未谷
晚學集載顏考功遺事於孫乳母傳云孫乳母者顏修來

考功之乳母脫考功於兵者也考功既貴割田宅奉乳母
及歿爲之服焉考功詩五言古雄秀浩宕幾於突過 國
初朱王施宋其邯鄲行一詩述其祖令邯鄲時戢太監高
起潛事語甚悲惻其長夏道中云山行頓忘疲曲棧穿蘿
蔦下臨千丈巖沙嶼何娟妙桃李綠青谿疎花白相照日
落蒼煙深餘香上寒嶠谷鳥將雛飛游魚濺波跳石梯絕
攀援終古無弋釣武陵爭問津翻令達者誚車馬常班班
幾人展清眺登太華山千尺峽云青柯圍翠屏四合無筈
崎東北窮石林劈空懸巨壑巉巖穴曠薄造化爭一候天
矯轉蛇龍宵冥穿鼉鼉側聞天籟發曠野雷霆鬪仰井窺
秋夏浮雲裊清晝白帝觴百神衆峰爲籩豆瓊臺阻且長
翠林紛何就際耳崖云振衣更南登詭狀乃非一蟻行綠

危樓逡巡皆股慄側身常窺耳茹趾妨齧膝吹徑乾松花
滴空熟崖蜜蕭槭無人踪坐惜幽芳失昔聞避世亂犬雞
喧雲日劫火燒咸秦遙慨人代畢遺竈尙可尋終當置蓬
室南峰云侵晨望南峰岩曉更天半仰凌變寒溫俯視殊
昏旦平岡始徐立亭亭步鶴鶴遊塵失秦隴微縷求沔漢
亂山互糾結豁然四奔竄欹傾如海濤泱泱天爲岸驅馬
過華陰豈爲窮壯觀徘徊俯清池濯纓復三嘆東峰云東
峰不可極乃知造化尊屹然鼎彝峙勢如虎豹尊松氣望
蔚藍無人踐霜根巨靈拓太古高掌誰能捫晨光沒河漢
似有雲車痕陰風折秋花吹落洗頭盆蝮局念鄉國久客
傷精魂且復望虞淵散髮落朝暉遊伊闕二首云羣山走
嵩陽空翠疊遠天西南斷峭壁中見虹霓懸高秋水痕落

沙石何清妍遊魚粲可數霞彩濯更鮮側聞風雨交奔淙
瀉鳴泉澄潭荇藻靜涼月生娟娟我欲乘輕舫中夜淩紫
煙紫煙渺無際悠然懷泗川龍門已曛黑跣步凌幽峭夕
風散輕陰飄忽見殘照冉冉行旅絕冥冥露鶴叫巖谷互
響答似聽蘇門嘯洛城與邛山延望空竚窳昔年盛歌鐘
達人久憑弔金銀接梵宇墟落存餘燒有懷向誰論長歌
下雲嶠游燕子磯云漾舟下澄江安穩廢輕楫遙空指蒼
翠久行漸重疊石蘚秋更荒臯蘭露猶裊孤亭四環望風
磴遂屢躡盤渦見雁驚幽壑蛟龍貼恐觸馮夷宮俯聽常
震懾詰屈雙銀杏天半垂黃葉波濤撼危巖栩栩亂風蝶
東西吳楚間舳艫邈相接鐵鎖沈千年金陵氣久厭蒼涼
金粟堆時時見樵獵鳳凰無遺音嶰竹誰更叶浩歌懷美

人褰裳不可涉，徬徨江霧消。斜日照城堞，次衛河。二莽莽
衛河濱，孤城對古津。風沙連塞地，鞍馬去鄉人。日落帆前
樹，烟含廟口春。客心從此異，忍見柳條新。送客云：舊許同
羈旅，胡爲此送君。望中三輔道，別後萬重雲。濁酒移燈勸
寒谿，入夜聞夢中。驚塞雁已似久，離羣柴門云：柴門無暑
氣，清興發今朝。山雨乍連夜，谿流初斷橋。秫田爭孔雀，風
柳厭鳴蜩。便擬褰裳去，輕泥漲未消。過奎泉云：芊綿春草
色，寒食滿天涯。亂水鳴孤渚，高城落片鴉。輝輝波動日，纂
纂樹交花。幽意何時愜，前林暮景斜。中秋云：青天動綠雲
月，出海門。東秋色晴搖樹，江聲夜起鴻。輪高看漸小，煙盡
望逾空。故國愁千里，清光永夜同。村居同家兄作云：僻地
慚高隱，多愁念歲時。秋容經雨盡，暝色到山遲。起舞憑誰

從狂吟且自怡更餘同跨馬莽莽向空陂郟城云去國今
何許鄉關淚眼中水吞淮口北天盡馬陵東春米煩鄰老
縫衣試小童相看饒笑樂不敢怨途窮咏雪云四更雨聲
絕莽莽灑平湖夜色去何早朝山看漸無村居圍戍火浦
溆守櫓鳥不見戴安道遙憐清思孤將歸云客睡醒何早
鄉心望轉迷月高喧櫓馬風遠應村雞醉恐鄰人厭詩從
僕子題高堂應少寐敢謂久羈棲房氏馬云何處憐神駿
房家好弟兄幸分 天子廐肯向衆人鳴金埒遊塵遠春
郊細草平玉鞭如可試吾欲賦西征集張帶三齋得濃字
云冒雨甯辭醉當歌豈再逢燭憐春夜短酒愛異鄉濃霽
色明雙塢離愁黯九峰萼鱸何足羨知已在吳淞題趙雙
白春耕圖云炎荒戈未息詞客老江關村徑連雲海禽聲

擬故山野橋驅犢過春雨荷鋤還隴上遺經在猶傳到百
蠻春日山中云絕巘餘亭古羣遊引興新鐘聲山向午日
氣水浮春坐愛薔薇發行憐翡翠馴淮南招隱未芳草憶
何人泊天如聞作云稍擊淮南楫連宵望大河星高知夜
氣風轉得漁歌問稼愁年禠懷鄉厭夢多燈前看旅燕吾
醉亦婆娑渡漳河云我昔夢遊漳水濱桃花樹樹開城闔
今來此地尋芳草無那輕舟送遠人樓前煙暝銅臺路天
際沙明白馬津長路關山歸未得莫將客思惱陽春鄴城
云鄴城風日暫徘徊榆柳清陰夾道開沃野北連天府關
浮雲西擁太行來韓陵勒石人何往洹水懷瓊歌自哀七
郡分藩從此始豈應彌望但蒿萊張茅云驛樹參差隴麥
交微茫一徑是張茅河流繞地浮三晉山勢連空結二嶠

雲外旌旄閒古戍洞中煙火出危巢崖花岸草空經眼那
得他鄉有樂郊登靈寶閣云荒城樓閣倚山村近郭風沙
入夜昏關塞陰陰當萬嶺星河袞袞下三門遊梁已謝平
臺宴入趙空悲國士恩日日東歸歸未得孤城吹角易銷
魂潼關云連山覓路縱橫斷粉堞當空結構牢萬里河流
蒲坂動九天秋色嶽蓮高燕齊無計撓秦帝關隴頻聞唱
董逃設險當年隸畿輔廟謨親見紫震勞望華山云潼關
西上見嵯峨路入雲臺佳氣多萬壑青松寒白日三峰積
雪照黃河天雞曉徹扶桑湧石馬宵鳴翠輦過擬向青冥
銷永夏蓮花玉井竟何如望汴城云馬渡關城拂早霜戍
樓吹角更悲涼山開廣武存孤壘天盡長河見大梁夾岸
黃蘆容對酒連宵明月伴還鄉狂歌擬上侯嬴塚汴水桑

田已渺茫京口云十里荒煙接岸青
金焦疑對兩浮萍連山北斷江樓出
潮水東還海氣腥機杼並愁蛟室盡
鼓鼙空向鷺門停孤舟擬雪蒼生淚
聞說君王不忍聽將至揚州懷王阮
亭云江船穩泛桃花水運道新開瓠
子河瓜步潮生吞海岸市橋風轉送
漁歌野殘禾稼愁年管路入鄉關厭
夢多最憶風流竹西在北征無奈布
帆何句如無端芳草歇總作故鄉愁
亂後人煙多近郭雨餘竹樹早驚秋
鄉夢自縈河曲外客愁更在灞陵西
皆高壯可誦

詠嚴子陵釣臺詩多着跡江南興化
李鏡月孝廉澄過釣臺詩有一夜客星
臨帝座千秋明月照漁竿之句脫口
渾成異常新警淮海英靈集載孝廉
布衣蔬食教兩子成立乃縱遊燕齊
魯衛吳越諸郡則亦奇士也其望羅
浮歌有云

水簾千丈海風倒吹粵東張南山太守謂此歌如見仙山
飛瀑信然孝廉又有遠火分帆影疎鐘襍鷓聲之句亦無

俗響

順治二年鄉榜

涇縣包慎伯大令

世臣

著有倦游閣詩文集

嘉慶二年鄉榜

大令詩

廉質峻整五言古直登鮑謝堂廡其月夜江行家君命和
云流鏡落澄練開帆入浩素隔浦風悲笳扣舷衣滋露疏
煙織平林明沙數棲鷺空翠沒層瀾遙蒼蕩寒霧聞詩卽
孔庭辨樹鄙謝句奇懷撰良辰慚誦東征賦遊鍾山二首
云昔聞沈光祿願從息心遊今來北阜林桂枝蕩揚秋霧
捲江樹薄一覽青徐收地脈結南戒流英鍾七州豈無草
堂秀雲窟緘名道赤巖綵蘿古鳥跡飛真留風泉瀉松澗
萬壑龍鳴收耳塵滌仙樂勝洗清穎流何當遇青鬢紫金

經可求跪讀三千日一雪山靈羞石扇不我關空望鏤霞
樓眇彼樓中人萬里霜煙愁懸崖若飛觀雲石斑蒼青苔
暈遊鹿跡松濤鳴鶴聲香霧薄亭午隱隱見柴荆長鬚一
老者侍童二娉婷了知是金仙再拜求丹經借我一卷書
謂我骨甯馨以正則治國知奇乃用兵展之皆赤文駁黎
不可明跪請授真訣輕雲促膝生雲生忽天半仙樂飄縱
橫襟詩云轉篷捲秋高客心鬱不寫躡躅青溪上徙倚長
松下浮雲滋暮色樓煙寒四野衰枝歸鳥疾薄浦去帆寡
搖搖倦遊人誰與遣此者

九煙先生遺集六卷

舊有芻狗齋集今未見

道州何子貞師夷戍夏扶

櫬歸里避暑杭州西湖時所贈本也九煙姓周

舊姓黃

名星

字景虞號九煙湘潭人也幼有神童之目六歲能文八歲

刻周郎帖十二入南監弱冠雋北關崇禎庚辰成進士授戶部嘗作芥庵詩序有曰余本湘人今寄跡白門於湘不忍遽忘猶復往來羈棲於湘者數四不知者多以余爲非湘人余亦不欲自明其爲湘人九煙以欽崎澹蕩之性處喧湫聲利之場其勢不能相入兼之少年磊砢感憤易生遇所觸往往發爲聲歌嘗自鑱一印文曰性剛骨傲腸熱心慈自詡與正人君子鬼神仙佛相和而與衆人多不合詩多風懷之作嘗錄其集中絕句云嘯傲江東二十年不知憂世與愁天一朝泛宅過湘浦始信低眉是聖賢七律云此身何故落瀟湘悶對長天淚幾行山水無緣供酒椀文章多病惱詩囊人情只向黃金熱世法難容白眼狂明日泛舟吳越去從渠自作夜郎王於五月五日投水死靜

志居詩話云九煙晚變名曰黃人字曰略似又號圃菴又
曰汰沃主人又曰笑蒼道人布衣素冠寒暑不易人有一
言不合輒嫚罵嘗賦詩云高山流水詩千軸明月清風酒
一船借問阿誰堪作伴美人才子與神仙年七十忽感憤
於懷仰天歎曰而今不可以死乎自撰墓志作解脫吟十
三章與妻孥訣取酒縱飲盡一斗大醉自沈於水時五月
五日也又仁和陳叟繼新居於禾晚節納石子懷中赴龍
淵寺門潭中死均不失爲申徒狄徐衍一流

昆明黃集卿侍郎孫身材短小弱不勝衣而器量宏深風骨
巖峻嘗以樸訥受宣宗知遇年未五十以親老引疾歸
養戴雲帆侍御炯孫於侍郎爲總角交又於嘉慶己卯科
與黃星海明府同出家文忠門下故雲帆味雪齋詩稿多

彼此唱和之作而侍郎詩則予未之見也近黃肖農
爲誦其棧道雜詩五古數章蓋其視學蜀中時所作詩筆
蒼深古秀直迥少陵入棧云朝陽射清渭扁舟越滉漾飽
聞棧道奇陸行恣幽賞陰壑鬱霧深高秋碎葉響連山如
漆城蕩蕩不可上堆疊呈變怪峻贈露精爽入天有巉巖
出地無餘壤飛梁躡虛空支撐腐木兩我馬旣虺隤驚却
肯前往滑笏履嚴霜性命付邛杖峰迴迷去蹤霧淨獲前
朗茲游信奇絕笑費屐幾緡沔縣道中云亂山行不盡脉
絡互聯屬初遇喜奇削稍習厭攀嵒凌晨問去程西溯沔
水曲寒流淨匹練洩泉鏗碎玉獨鷺破煙青孤帆飲川綠
蕭蕭楫欄中慙落幾家屋半扉翳蘆花破網挂疎木時見
溪邊人添薪斧脩竹不意險巖盡清川此豁目安得解征

鞍借我徑三病閱家坡云蜀道如青天斯語聞已熟那知
履秦棧崎嶇勢相續途窮竟欲返奇險常在目蠶叢關已
久纖徑入犂犄行程衝曉寒危坂射初旭斷澗泉有聲陰
壑草猶綠蜀樹亘山椒秦雲度澗曲駸駸恨馬蹄過眼煙
巒速

鑑湖祝秋齡少府

大年

著有雪鴻游草少府夙耽吟詠弱冠

足跡遍天下胸次高曠發之於詩有海闊天空之象登泰
山詩云捧檄過青齊泰山日初曉男傭鬱輪囷羣峰天外
矯絕磴摸雲登側身出塵表振衣萬仞巔俯瞰大千小偕
同寅建郡貞元閣小飲云石闌一路列如屏高閣重新景
更婷野水爭流千澗白夕陽斜映萬峰青閒雲舒卷隨飛
鳥脩竹灣環抱小亭到此頓消名利念黃梁熟未夢先醒

九日偕友云客子天涯共感秋欣逢佳節且登樓雲山縹緲飛黃葉海國浮沈等白鷗一抹斜陽人影瘦滿懷鄉思雁聲愁未知孰是題糕手撚斷吟鬚得句不

侯官蕭若雲山人

夢德

著有若雲詩稿若雲既歿遺稿散落

王赤蘭茂才得於市肆中詩多艷情之作今錄其咏物懷古諸句如柳花云鋪成水面文章淡吟入閨中格調工飄泊有時黏釣艇顛狂最慣點春衣三月行人愁遠道六橋晴雪壓雕鞍千絲挽袖思前度幾點浮萍認後身新筍句云冷雨壓時千个併寒雲挑處一僧歸瘦蝶云園林冷落傷千古金粉飄零換六朝弔漢宮云誰憐金碧如塵委無復蕩蕪入夢來若雲故多佳什此特存其梗概耳瘦馬詩後四語云願盼何心爭掣電功名無相貌凌煙怪來疲病

西風裏不遇孫陽總可憐慷慨激昂具見生平抱負

海目鍾玉溪明經

承業

潮西宿儒也屢困場屋著有學爲圃

詩文稿嘗記其觀潮詩有富春水落如浮地龕赭山高欲

撼空之句又詠桐縣云有態石闌沾正細無聲山館墮應

遲賦物的切其嗣君梅初諸生

志榮

亦能詩多名句可採

如亂峯青送客深樹碧啼鶯流水落荒徑清鐘出上方夕

陽帆影亂風色嶺雲忙鳥息江邊樹人行郭外村置之賈

長江集中幾無以辨矣

翁氏姐名雀錦吾母吳太孺人養女也性至孝事吾母克盡

子道嫁故星士正芳爲窻室星士物故遺二孤姐氏飲苦

茹辛貞潔自守伯叔欲奪其志姐氏不可吾母迎之歸俾

得撫孤成立遂以成其志道光十六年奉 旨旌獎節孝

卒年六十有三錢塘馮山公詩所謂松柏久於冰雪耐不
隨弱草綠春風姐氏有焉

侯官鄭生褒揚篤內行嘗從余習舉子業工制藝詩筆整秀
惜乎天不假年所遺詩草有名句可採者如孤城明月照
荒店夜燈深畫闌看放鴨深樹聽啼鶯草痕侵閣綠山色
入窗青孤帆當檻落去鳥入雲高山容積雪澹鳥影入煙
無谷響樵戣木市喧人賣魚閒雲自來往去鳥獨高低皆
可入主客圖

夕陽在水客歸渡黃葉滿階秋到門此侯官翁蕙卿茂才
聯句也秀語天成薛君采見之定選入名句圖李香萃爲

余誦之

一言足以解人積憤者雖傭夫婦孺亦芻蕘之可採余於道

光丁亥遭家不造有黃媪者年六十餘余外家之執爨婦也來視余嘗爲余誦留得五湖明月在不愁無處下金鉤余聞其言爲之意釋此一言解憤之明證也

海珊詩鈔烏程嚴崧瞻刺史

遂成

著

雍正二

年進士刺史詩結響沈

雄鍊格高壯詠史諸作尤爲擅場其名句可誦者如池深魚氣靜樹密鳥聲歡舫聲離岸小山氣壓城寒雨方得氣能醫草風自生香不借花無數夕陽遮不住好風吹出讀書聲皆警句也

隻字也須辛苦得恆河沙裏覓鉤金此錢塘金壽門布衣農句也布衣著有冬心集詩格高簡不落時下纖桃率易之習其詠苔云多雨偏三月無人又一年亦超脫無痕句如他鄉樂亦苦淚滴酒杯間亦入情之語

明知愛惜終須改但得流傳不在多此會稽商寶意太守

盤

句也太守著有質園詩集

雍正八年進士

春融堂集謂太守詩上

迫四傑下仿元白余謂太守詩有極似太白者其五古友

人索觀近詠七古八蠻進貢圖尤稱奇作爲集中之冠云

武進劉文定公

繪

著有繩庵內外集

字春涵廩生乾隆元年召試博學鴻詞第一

文定謙和公諱以清修自厲詩格亦沖和清穩其五古碑

洞詩七古謁華陰廟爲集中大篇句如陣圖聚米三邊地

賦版流沙半壁天十里好花收容店九秋真畫出田家亦

娟秀可讀松軒隨筆謂劉文定衡文嘗言佳卷多至溢額

始難在取繼難在去較量進退每至夜分人勸節勞公曰

卷之佳兄弟也一去取間於我甚易獨不爲士子計乎嗚

呼公用心之勤如此即被棄者可無恨

元和惠松崖諸生

棟

精於漢學錢竹汀詹事云先生自幼篤

志向學家多藏書日夜講誦自經史諸子百家雜說靡不

津逮中年課徒自給陋巷屢空處之坦如乾隆十五年

詔舉經明行修之士總督尹文瑞公黃文襄公交章論薦

有博通經史學有淵源之稱惠氏世守古學而先生所得

尤深擬諸漢儒當在何邵公服子慎之間撰有周易述易

學易例古文尙書攷左傳補注九經古義明堂大道錄禘

禘說精華錄訓纂後漢書補注九曜齋筆記松崖筆記松

崖文鈔諸史會最先生序吳企晉詩謂詩之道有根柢有

興會根柢原於學問興會發於性情二者兼之始足稱一

大家先生不多作詩而此論極精當

萊陽趙冬郎澐尹

隨

著有忘憂草排悶詩草二卷

乾隆甲子鄉榜詩

有磊落絕塵之概佳處幾合浣花水部爲一手其甲戌秋
末重過寶藏寺云望中認孤松步去逾層峰曲磴綠苔沒
清泉落葉封向僧索山意繞石覓雲蹤莫怪苦留戀十年
一過從和張水部聽夜泉云夢醒聲盈耳寒泉隔澗流心
知無住處想不到源頭響激疑侵石音清欲近秋無人同
夜起涼月獨尋幽發淮揚舟中卽事感懷云一天陰雨蕩
輕橈僵卧孤篷感寂寥敗屋當風開戶牖荒林終日叫鴟
鴞空驚曠野多新鬼誰慰殘魂賦大招紫綬緋魚朝士志
臨江灑淚有漁樵

閩縣王叔蘭茂才

道徵

著有石室詩存詩多質樸五言律尤

爲集中之冠嘗記其夢中作云日暮月初出夜深雲未歸
清風常入抱白露欲霑衣三徑獨來往一身無是非長年

足滋味黎藿滿山肥

神仙者出世之學與入世異余讀道德經參同契諸書知其說信有之桐城姚姬傳先生云神仙不死此達天之事其人無功德於民何以居不死之壽故必兼功與行而後可以成仙行不足者功雖專天所不許真知言哉閩縣王未蘭茂才神仙詩云離合悲歡一戲場幾人遺臭幾人芳賢愚各抱有生累得失終成無事忙訪道願從赤松子凌虛好入白雲鄉吹笙飛鳥傳家譜未必神仙盡渺茫讀此詩令人作吸露餐霞之想

閩縣陳秋坪大令

登龍

著有秋坪詩存大令詩其音溫以平

其氣疏以直其自入蜀後徙陽塞外諸什原本山川極命草木黎風雅雨雪帳冰燈蠻歌梵筴蕃馬羌禽憂愉喜愕

之狀靡不一託之於詩蓋西荒窮徼之氣沈悶數千載一
旦發瑰奇而被藻飾乃自大合始其聲耀豈特如靈運子
厚之於永嘉柳永已哉至如撫馭夷酋寬猛貪廉之道集
中三致意焉信乎仁者之言又次山春陵目黎瀟吏之匹
也詩如和門遺興云中土猶烽火西邊息鼓聲春陵悲漫
叟沙磧靖安西異代空懷古殊方且寄棲閉門聽風雨隨
意寫無題登中渡城樓云一上譙樓萬里情蒼蒼關塞旅
魂驚江從青海流來急人向白雲多處行畫角西風吹古
戍亂山斜日近孤城倚欄不盡傷零落欲賦登高恐未成
福州長樂王成旃廣文藤著有足雨宦詩藁嘉慶己卯鄉榜廣文精
反切之學詩亦清麗嘗記其重陽渡河云金粉贖脂隔岸
香扁舟搖蕩水中央驚沙夕起迷天白駭浪朝翻接地黃

風景百年如過客江山萬里此重陽
諸囊菊佩渾忘却惆悵登高在異鄉
句如入都話別云長橋三月雨小舫
半帆風張家灣舟中云無山天更濶
近水月先來和岳祖謝先生養拙元韻
云百年清福裏萬事靜觀中雙溪日夜
泊云五千里路雲橫嶺三兩人家月在
扉秋夜云敗蕉喧徑秋無雨落葉敲窗
夜有風

閩縣龔海峯先生循化廳志藁一書其論禦西夷之法甚詳而密可以見諸施行先生爲吏洞民情諸軍事膽大心小今之循吏而兼名將者也天下督撫藩臬府州縣皆如先生其人則天下何患乎不治薩檀河大令哭先生詩有漢朝良吏卽功臣之句誠非過譽

仁義之性出於不讀書之人尤爲可敬山東汶河亦作董翁

名滿華業飯舖余同年邵武元君長模從京都回病卒其
家元君病亟時翁爲之醫藥卒後爲之殯殮共費二百餘
金並寓書閣中與其嗣君令扶匱歸其嗣君至哭謝之還
其金翁笑而藏之余述其事於朱伯韓侍御侍御記以詩
云千古幾人真好義叔牙身後有逢時余曰董翁更難於
叔牙叔牙與仲父爲平昔之交董翁與元君特萍水相逢
耳求之士林尙難其人況市僧乎

藻華字
逢時

甯化張孟詞進士

臆蛟

遺草零落僅存數首

乾隆癸卯解
元癸丑進士

士古文詞源出秦漢駢體文迨近燕許大興朱文正公督
學吾閩重其品學愛之如子贈詩云八千閩士較雄雌第
一應推張孟詞萬錦雲霞天上筆雙清梅雪歲寒姿其推
許至矣進士乙卯赴闕補殿卒於都下著有山海精良二

十餘卷未成書詩不多作然作者格律謹嚴直入唐人之室其場二樵昆仲邀飲探梅卽席留別云園圍環扇靜下帷美人林澹隔溪湄相攜翠袖天寒日無奈清樽月落時
縑素有情勞躑躅山川何事怨倭遲殷勤挽駕前綏在風雪猶期贈一枝

科舉之法以八股制藝取士實不足據況有司故事奉行士子以腐爛時文互相弋取科名而去此人才所以日下也
錢塘馮山公八月十五夜場屋聞雁作云對策五千言主司例不看野夫必盡誠正書至達旦讀之可爲寒心錢辛楣先生欲改次場經文作首場以絕勦襲之弊余謂以次場作首場善矣其不愧爲司文命有會有幾人乎

馮山公解春集如疎月照水澹煙出林又如遠寺寒鐘空山情

磬唐之王朝川宋之陸渭南元之虞文靖明之薛君采幾
於合爲一手集中七言律尤超脫絕塵非鈍漢方夫所能
躡步閨三月三日云三句兩見永和春重過江頭逢麗人
修竹更抽十尺長幽蘭又采一番新飛飛黃蝶覓殘蕊閣
閣青蛙泗白蘋不獨流觴感陳迹落花前日已成塵春盡
喜晴夕登水閣送孫大東歸云九十春光無半晴晚憑水
檻綺霞明疎籬漸壯薔薇色芳草竟吞鶖鵝聲穀雨陰來
蜂蜜濕棟花風起燕巢成枕流仰視金波滿漱石愁無孫
子荆歎劍云嘗思天外倚昆吾偶說人情吼湛盧頭白似
霜終破晉脊文如水不思吳風胡論後龍精顯蓋聶噴時
虎氣孤有一崩緜彈不得大魚入海小魚孤

番禺張南山云咏雲如王荆公句云誰似浮雲知進退纔成

霖雨便歸山美之也又宋人句云無限旱苗枯欲盡悠悠
閒處作奇峰賁之也汪東山句云閒雲莫戀山頭住四海
蒼生正望恩勉之也陳狷亭句云却怪紛紛頻出岫不曾
行雨竟空還諷之也用意不同各有其妙按陳狷亭吳江
三十九年進士有
微塵散帚二集

侯官吳瑞人誕尹

聯稱

詩多慷慨之音

嘉慶

榜

嘗記其名句

如沙鳥白映水簷花翠入樓雞豚春社酒桑柘夕陽錫殘
雲收極浦明月照孤闌落日羣山見殘煙遠浦沈皆可入
摘句圖

餘姚鄭篤參孝廉

世元

幼穎異博綜羣籍一發之於詩

康熙五十一

九年感懷雜詩及捉船行諸詩皆傳作也其名句之膾炙
人口者如人皆欲殺今之白我醉須埋昔者伶可謂奇警

番禺張南山則賞其客中寒食最銷魂之句謂旅人不堪
誦亦名句也

世無名與宦人心皆太古世無輪與蹄人皆守鄉土此襄城

萬西城孝廉

邦榮

句也

康熙五十九年鄉榜

警世之句卽昔人所謂

不婚宦情欲減半之意

仁和孫質爲先生

義

道光乙未余鄉試薦卷座主也詩有唐

音嘗記其客中感懷有乾坤高下鳥身世去來雲之句詩

境可謂高曠其贈昌彝句云冠場策本羅星宿下第文猶

泣鬼神先生愛才之心於茲可見矣

先生道光
四年進士

余讀錢氏家變錄竊歎虞山妾柳如是之忠於錢氏焉故凡

忠孝節烈之事不必盡出於讀書之人大家之女余友高

安朱芷汀孝廉有詩云家變獨能持大義虞山身後有家

姬正言其能知大體也

楚南曾滌生侍郎國藩深於詩余嘗於朱伯韓侍御宅見之

又從王子壽比部筵上讀其五言古詩風骨入古今上登極侍郎正色立朝閉邪陳善不愧古之遺直焉

雲臺先生入滇詩境視平日又開境界蓋以神似輞川也其
湘江村舍云湘山如翠黛湘水如碧玉巖下有居人林深
不見屋落落百尺松陰陰萬竿竹竹密一徑空照見人皆
綠况有流泉聲清冷比琴筑如此山居幽其人定無俗笑
我坐篷窗秋陽正相曝可渡橋夜月云橋東峻坡石突兀
橋西行人鏡出沒一樓窗外萬山深風弄溪聲洗春月春
月竟是山中多百夷安樂春氣和蠻花飛落山村坡兒女
吹笙跳月歌橋在威甯宣威二州滇黔分界處健忘云健忘有病藥休嘗

老去中懷難自強公案煩勞心少力早年記誦學全荒本
無蕉夢鹿何夢不但忘魚亦忘誦常誦茗何所助可知
此意出蒙莊

畏壘山人詩集長洲徐大臨太史昂發著太史宮詞百首遍

播旗亭古詩如雁門關彭蠡湖漱玉亭皆入唐賢之室名

句之最者如草木尚生無患子男兒那作可憐羶可謂新

穎康熙三十九年進士

雪峰藏白日雲谷束青天此新安呂天益光祿謙極句也雅

近警鍊其全集純學宋派疎爽有餘頗嫌質直無味康熙四十年

八年進士

千古江山風月我百年身世去來今此山陰王弇山孝廉霖

句也語意超脫髣髴陸放翁康熙四十四年進士

朱竹垞先生玉帶生歌非胸羅萬卷者不能辦可稱千古奇作

秣城王秋史廣文莘著有二十四泉草堂集康熙四十年進士秋史

嗜古好奇閉門苦吟詩說髒有奇氣嘗以黃葉下時牛背晚青山缺處酒人行得名者

太倉王若干太史時憲著有性影集其名句爲時傳誦者如

青山兩岸尋詩路黃葉孤村賣酒家可謂詩中有畫康熙四十年

進士

長洲顧俠君庶常嗣立著有秀楚閭邱二集庶常精於元人

掌故其讀元史五言古一詩可稱包括無遺粵東潘伊初嘗誦其積雨濕江雲林深白一片春風急吹開青峰遞隱見之句謂爲孟山人之亞

射鷹樓詩話

卷十一

七

宜黃符雪樵明府

北綸

著有夢梨雲館詩鈔詩筆清拔亦多

激切之音其南臺雨望云獨酌不成醉寒光生佩刀登臺
攬橫海終古鬱奔濤黯黯歌樓換蕭蕭戰艦高尋思塵世
事天地一何勞城樓晚眺云短堞夕陽明高秋邊角聲海
雲紅不定關樹碧無情天蟄魚龍氣人思草木兵枕戈劉
越石慷慨本生平漫興云威將軍死無良將越國山川酒
一樽從古華夷資重鎮多時旗鼓掩中原蒼涼落照啣烏
石浩蕩長風撼虎門腰下陸離三尺劍會須踏浪斬蛟龍
句如山雲動高興野鳥慣低飛石縱出天勢松沈藏澗聲
梨花山館雪榕葉水樓煙鳥聲孤館靜苔意半庭閒七言
如出天孤墉倚雲白奔海長江搖樹青風生絕壑松濤壯
雲護層巒石氣沈蒼雲大野高鷹健白浪荒江怒馬來江

山浩浩初迴棹風雨沈沈正閉門酒情慷慨逢人易劍氣
縱橫入世難不磨肝膽狂何惜已老頭顱事可知雁外關
山游子恨蛩邊燈火古人愁萬家砧杵懸秋月千里關河
動客星皆清挺可誦

男慶焯斟

射鷹樓詩話卷十三

侯官林昌彝惠常輯

潘四農云人與詩有宜分別觀者人品小小繆戾詩固不妨節取耳若其人犯天下之大惡則并其詩不得而恕之故以詩而論則阮籍之詠懷未離於古陳子昂之感遇且居然能復古也以人而論則籍之黨司馬昭而作勸晉王牋子昂之諂武曌而土書請立武氏九廟皆小人也既爲小人則皆宜斥之爲不足道而後世猶贊之誦之者不以人廢言也夫不以人廢言者謂操治世之權廣聽言之路非謂學其言語也籍與子昂誠工於言語者學之則亦過矣況吾嘗取籍詠懷八十二首子昂感遇三十八首反覆求之終歸於黃老無爲而已其言廓而無稽其意奧而不明

蓋本非中正之旨故不能自達也論其詩之體則高拔於俗流論其詩之義則浸淫於隱怪聽其存亡於天地之間可矣贊之誦之毋乃崇奉愉人而獎飾諛辭乎宋人論詩每以陶阮並稱不知陶之天機自運其言平易而昭明君子之詩也阮之荒唐隱譎純爲避禍起見小人之詩也尙不逮稽中散之樸直何論陶彭澤哉元人云論功若取平吳例合把黃金鑄子昂者亦誤也唐之復古者始於張曲江大於李太白子昂與曲江先後不違子昂感遇之詩按之無實理曲江感遇之詩皆性情之中也安得以復古之功歸子昂哉或謂昌黎稱唐之文章子昂李杜並列而杜公於子昂尤三致意送梓州李使君云遇害陳公殞于今蜀道憐君行射洪縣爲我一潏然冬到金華山觀云陳公

讀書堂石柱仄青苔悲風爲我起激烈傷雄才陳拾遺故
宅云位下易足傷所貴者聖賢有才繼騷雅哲匠不並肩
公生揚馬後名與日月懋終古立忠義感遇有遺篇杜公
尊子昂詩至騷雅忠義日之子烏得異議曰子昂之忠義
忠義於武氏者也其爲唐之小人無疑也其詩雖能掃江
左之遺習而諷諫施諸繫逆烏得與曲江例觀之杜韓之
推許許其才耳吾不謂其才之劣也若爲千秋詩教定衡
吾不妨與杜韓異王元美云孔雀雖有毒終難掩文章謂
嚴嵩也究竟今人誰肯讀嚴分宜詩者於嚴嵩則嚴之而
寬黨逆之阮籍陳子昂此人之慎也不明明辨則教在聖
教之外而才士一門遂爲小人之逋逃藪害豈小哉

四農又云余因論阮籍陳子昂而有觸於宋之王安石安石

詩亦北宋名家也然安石有六大罪而崇信釋氏猶不與焉欺君一也蠹國二也病民三也用小人四也逐君子五也侮聖經六也蓋合唐虞之共驩春秋之少正卯而一之此舜孔之所必誅而宋人以之配享孔子不獨欺當時並能欺後世信乎小人之傑魁百代所罕見也愛其文詞而學之則不惡不仁者矣亦人之慎也昌彝謂安石更有一大罪子雱死立其墓碣曰亞聖王雱之墓是安石以聖人自居矣合四農所數共七罪

道光壬辰仲秋同里李蘭卿觀察

彥章

觴余於石畫園卽席

拈石畫園三字分咏觀察拈畫字成七言長篇詩排界可
以繼響坡公其詩云蒹葭秋水清涼界園名蒹葭草堂勾留一半
綠詩債招隱終難守澗阿讀書恆欲交并介眼前忽遇素

心人怡有幽花兆蘭話

園中有小蘭話齋是日庭前素心蘭初開一枝若爲之兆客來

不速會不期空谷訢然聞警欬林生仰屋好著書恬懷博
涉今王勸近來鬻序乍飛騰世俗驚傳有良韞儲才有用
交有神科第非徒誇拾艾我將六月帆南風巖桂留人秋
已屆誰知還得一樽同舊雨流連無此快中叙聞中風雅
一段以文繁未錄結云小園地僻雜賓稀一飯能煮瓜
薤青苔及榻未嘗掃奇石成山皆可拜清幽坐愛薜蘿深
談笑頓忘魚鳥怪坐中正有石林生

表弟葉蓮地喜畫時亦在座

主客

圖成須早畫按石畫園爲宋郡西園地蔡忠惠曾南豐皆
有詩明曹石倉薛夢雷諸公嘗遊讌其地園初歸林同
人吉人兄弟爲荔水莊後歸李氏乃割西園一隅其地爲
曹石倉所建雲月菴梁間題字猶存

宋儒龍谿陳安卿溥北溪字義云大抵妖由人興凡諸般鬼神之怪都是由人心興之人以爲靈則靈不以爲靈則不靈人以爲怪則怪不以爲怪則不怪伊川尊人官廨多妖或報曰鬼擊鼓其母曰把搥與之或報曰鬼搖扇其母曰他熱故耳後遂無抵只自主者不爲之動便是無了細觀左氏所謂妖由人興一語極說得出明道石佛放光之事亦然近嘉興袁漫恬棟鬼神詩云鬼神事幽遠世人多惑之趨避或紛紜禍福相參差淫祀希邀澤祝史勤禱祈避忌乃多端甚至蠱巫師舉世紛狂驚誰能正其非讀此詩可以卓然不惑矣

北谿字義又云昔有僧入房將睡暗中誤踏破一生茄心疑以爲蟾蜍之屬卧中甚悔其枉害性命到申宵忽有叩門

覓命者僧約明日爲薦拔及天明見之乃茄也

花間笑話
襲此事而

不言此只是自家人疑便感召得遊魂滯魄附會而來又

如遺書載一宦於金山寺薦拔亡妻之溺水者忽婢妾作
亡魂胡語言死之甚寃數日後有漁者救得妻送還之此
類甚多皆是妖由人興無孽焉妖不自作袁漫恬鬼神詩
一云淫祀非我分隔膜情相睽強焉附知已不歆空調祠又
云神靈或來去冥漠乃易欺衣冠昧幽明庸愚驚福威世
之惑於鬼神之說者可以返矣

道光元年秋余病幾殆恟恍間夢到一地似三十六間者入
門則有粉白黛綠數千人列左右皆前代宮妝者余遂登
堂畫屏忽開中立一女貌豐而美旁列侍女數十人持一
紙示余中有詩二句云一枝繡枕倚郎君情重巫山一片

雲時余所倚者乃繡枕也女給筆硯命余續後二句余援
筆書云莫是花妖來入夢山人好道薄紅褰女閱之大怒
擲紙於地命侍女推余出門閉砌然有聲余驚醒吾母哭
於枕旁方知死而復活而最異者女詩二句竟大書被上
字蹟如烟經時始滅吾父吾母皆見之可知人心一念之
正諸邪皆不能入程子所謂一敬足以備百邪是也

居官者有一二善政可傳便成佳話况功德在民乎吳江吳

松巖大令

鶴順治乙未進士

官漢川知縣著有梅花草堂詩集性

鯁直負經濟才令澄邁時值黎人作亂斬其魁玉德等餘
皆就撫又以計降叛賊孫賢又擊走鄭成功餘孽楊二等
書生而多武功豈尋常循吏比耶論功當遷擢總戎忌其
功格不得上後調漢川以失上官意落職詩皆有爲而作

無裁雲鑲月之辭班史稱循吏以文章飾吏治作者以吏
治爲文章集中長篇古詩加石城婦登擔山諸詩不減元
次山公官漢川時邏者夜獲一人吳姓而應童子試者袖
有絕婚詞家貧爲婦翁所拒憤而作此公試以桃之天天
題文立就公贈以詩有請君賦就桃夭什好向藍橋覓路
行句其婦翁聞之卽招贅其家至今荆南傳爲美談亡友
漢陽劉棻雲傳瑩嘗以其集惠余云

漁洋山人萬首絕句選凡例云七言初唐風調未諧開元天
寶諸名家無美不備李白王昌齡尤爲擅場昔李滄溟推
秦時明月漢時關一首壓卷余以爲未允必求壓卷則王
維之渭城李白之白帝王昌齡之奉帚平明王之渙之黃
河遠上其庶幾乎終唐之世絕句亦無出四章之右者矣

中唐之李益劉禹錫晚唐之杜牧李商隱四家亦不減盛
唐作者云山陽潘彥輔詩話云唐人前有絕句其原本不
爲不富漁洋選之每遺佳作隨意簡出如右丞相送臨高
臺吹簫凌極浦太白天下傷心處剗却君山好淥水明秋
月少陵萬國尙防寇春來萬里客襄陽移舟泊烟渚蘇州
獨鳥下高樹隨州日暮蒼山遠劉方平夢裏君王近耿漳
返照入閭巷金昌緒打起黃鸞兒柳州九扈鳴已晚香山
珠箔籠寒月義山向晚意不適致光羅幕生春寒以及劉
采春囉噴曲等皆天下之奇作而悉屏而不登何也至七
絕中遺漏尤多如賀監之少小離家太白之舊苑荒臺李
白乘舟楊花落盡龍標采蓮曲少陵贈花卿等指不勝屈
且旣識唐人絕句人主人臣是親家今朝有酒今朝醉詩

當日如何下筆後人如何竟傳而又選近來時世轉先輩
好染髭鬚事後生三十年前此院遊妃子偷尋阿鵲混等
作何也清平調原非太白佳處然神氣飄逸自如迥非中
晚人所能摹襲漁洋選中晚宮詞纍纍盈幅而削此三章
舍天姿而取脂粉又何也王建宮詞百首雅正而有餘地
者甚希選至二十四首猶嫌其濫然建之宮詞意境不高
尙非苟作至羅虬比紅兒詩王渙惆悵詞複意礙詞冗沓
甚矣重疊載入又何也

粵東溫伊初孝廉自嶺南寄來番禺張南山太守松心詩略
其詩有關時務者余已採於前其詠懷雜詩真樸而有道
氣尤爲集中之冠詩云地以外皆天外究何物若云大
氣舉氣又出何穴何物能載氣操縱誰蓄洩海深不可測

深極終有訖不能出天外仍以地爲窟何以衆水歸萬古
長不溢元化既渺茫真宰亦恍惚問天天不言氣至自寒
熱論語讀終身時時念三畏人惟無所畏遂至無所忌小
人知畏威貴以刑佐治君子首畏天夫人在其次至於聖
人言垂訓示萬世理本如日星切實贊天地古來大奸雄
亦知畏清議三綱與五常賴以弗失墜言敬尚和平言畏
乃惕厲人惟有所畏庶幾不敢肆道經五千言心折惟一
語曰道法自然此語實宗主試觀人未生胎中血爲精及
其纔出腹忽忽變爲乳丈夫美鬚髯婦人好眉嫵假使亦
有鬚世上無美女物理之自然不可以悉數偶舉一兩端
類推試觀縷釋典千萬部心折惟兩言兩言曰因緣先聖
所未宣苟無因與緣至親亦等閒果有因與緣雖疎如弟

昆每有深相知宛若舊好敦更有未識面愛慕縈心魂不解何以然此中有因緣倫類多如斯不獨夫婦然忽生而爲人聚若草間露忽化爲異物散若空中霧輪迴固無稽星隕亦鮮據既生必有死如旦必有暮貪癡若齊景欲戀不得住曠達如劉伶未埋已先慮秦皇與漢武均被方士誤請看陳人陳孰保故我故桑榆猶可收心精亟陶鑄顏子三十二壽同天地長彭祖八百歲此言殊荒唐命長無可稱雖彭亦如殤昔者里有翁耄耄猶康強有口能飲食有體能冠裳當其居華屋已似歸山岡吁嗟人間世大夢同一場夢同中有異各各留心光心光死不滅心血於此藏大者爲道德小者爲文章

心之精神謂之聖此見於大戴記者也古聖賢無不愛惜精

神豈獨仙佛之書諄諄告戒乎近讀番禺張南山太守詠
懷襟詩及燭花詩真釋氏所謂當頭棒喝者也詩云天心
最好生與以生生理陰陽兩相媾人世大歡喜奈何圖歡
娛不顧耗骨髓甚者如畋漁縱恣不知止傾國與亡身大
半因女子天公本好生世人乃好死何如玩名花以花當
彼美香國卽柔鄉吾將老於此燭花云燭花頻剪又宵分
得句何妨寫練裊傳語少年須自醒莫將真髓換巫雲

聊以拙齋詩文集閩縣鄭松谷太守

鵬程

著嘉慶丙辰

進士

太守幼得母教制行端方及通籍後出守袁州常德強教
悅安人心愛戴治民之暇尤好振拔單寒誘掖後進性剛
方不喜迎合曰阿附大吏要結縉紳以求名者巧宦之所
爲吾弗屑也山陽汪瑟菴先生常稱曰鄭公渾樸端厚愛

民以誠今之醇吏也詩亦真樸有味無時下鬻淺率易纖
佻三種習氣其青花硯行爲裴淡如孝廉作詩如殞霞倒
景餌玉元都詩云媧皇補天東南竭雨洗霞蒸崩一石神
膠未泯斧鑿痕泉液灌之還生根胚胎靈氣蘊精神濛濛
肌理含青翠星精拂鬱不上天來爲人世吐雲烟石上見
之不敢取磨刀睥睨面溪淑伺蛟龍睡劃中堅花紋細碎
金線連密排星斗光轉粟微帶氤氳潤如玉菁華消歇慶
厯年君今得此翰墨綠墨池夜夜發光怪恐攝神丁歸天
界

順德黎二樵明經簡

詩書畫各臻其妙

乾隆己酉拔貢

其於詩天姿

既超又益以孤往之力成其獨造之能玉壺山房詩話謂
其詩窈峭深警新響軋軋見者咸嘆爲苦吟而不知其詩

才絕敏縋幽鑿險之語援筆立成蓋神乎技矣其入羚羊
峽寄閩人云清江連白沙秋晝如月色蒼然暮帆影涼風
轉秋碧舟行入青山山青立天石峽雨去却來山颺順還
逆哀狖遞雲屏清切不可極違峽已十里隱耳淒不息端
州萬家夢上有孤月白是時水月夜知復當窗織星露江
上草草根蟲唧唧唧復唧唧吾聞汝歎息歎息不能夢
有身無羽翼寄黃蘗樵云墻頭暮鴉飛不起鴉背松聲冷
於水如山北風壓破屋拍枕大江浮兩耳窗竹偃蹇欲折
樞急雨落瓦寒有稜饑鷓嗚嗚狀嘯鬼紙窗琅琅如裂冰
風頭愈大雨點重松子踰時尙跳動燈危在壁寒不明心
戰如波靜還湧我憶滇山西遠征冰天苦月寒崢嶸兩奴
爭被靜一閑獨馬戀人悲自鳴身勞歸惜妻孥苦裘敝倏

驚年歲更煌煌肥馬從朋友站站飛鳶閱死生生還喜爾
情過絕以病示人無病骨明日梳頭視青鏡今夕苦吟生
白髮莫思廣廈庇衆寒少陵詩翁古迂拙曉出村舟中作
云懸山覆水不到水水雲似海不似雲一身自作海上客
此山離立雲中君江雲漸高山漸小初日平鋪萬波曉須
臾山在金碧中全見山腰失山杪八風忽展東南溟天水
光白山光青張帆看山勢爭轉瘦約一束室亭亭烟螺似
我病婦態相送遠近同含情我於山水於畫手如此深附
畫未成山阿片雲釀水氣欲出未出遲不輕祇因風夜客
獨宿始肯入城爲雨聲北風篇云北風欲使南海翻萬怒
一洩雙洞門客居近樓簷端木葉鳥鼠走巷口朔漠雲沙昏
樵夫客帳夢水村水面一點浮人烟海勢吞沙浩無地風

力揭波聲塞天萬物簸揚一室靜古佛跏趺居士病龕火
不搖凍似冰霜筠自戛清於磬夜來知爾夢亦勞魂弱不
競江波高嬌雛惡睡自呼被遊子病軀誰贈袍故人別盡
滄江晚但坐不歸傷別遠南飛一聽鴻雁啼北寒潤與江
湖滿明日空天秋照水八尺蒲帆盡情展尙有寒花村屋
深未覺疎籬酒杯淺邕州云峴峴荒城畫角哀滔滔急水
白沙頽不勝今昔親垂老如此風烟我再來幾個遊人非
斷梗是何名岳入邊垓故鄉尙有羅浮月可許幽輝滿鏡
臺春寒云盲風伏雨罨邊城城下波濤氣不平一棹春寒
閣鄉夢千家人語入江聲沾衾搖落關楊柳破被尋常得
弟兄仰愧營巢老烏鵲拮据身爲護雛輕

番禺張南山太守古歌謠辭旨簡質意味深長真能神與古

曾塵海謠云魚不離水龍不離雲人不離塵生生引云兩
精遇百骸具兩精凝百骸成欲生人施爾精欲長生保爾
精太平歌云人皆有情天下太平醒世歌云爾勿恃強轉
眼夕陽北邙荒郊上有牛羊長短歌云我手十指有長有
短如何使人要我意滿衆寡歌云兵不在衆在乎用命共
膽同心寡可制勝去日行云百年三萬六千日今日忽忽
又去一鷄鷄言云能甜要能辣能收乃能發能巧要能拙
能死乃能活有鳥鷄鷄代人說慎醫行云命不可知可知
者醫醫不可知以人命爲兒嬉吁嗟乎慎之

張南山太守咏物詩風韻婉麗渾脫無痕如白雲初晴幽鳥
相逐真有繪影繪聲之妙秋海棠云前身應是斷腸人楚
楚嬌紅似帶顰修到名花仍薄命飛來寒蝶共傷神雨中

有恨含清淚，風裏無香悟。淨因一樣傾，城分冷暖豔。妝西
府正濃，春綠陰云暄。時燕雀靜，時蟬涼透。槐邊與竹邊，萬
樹團雲天似海。一亭臨水日如年，鞭絲裊裊人初去。琴榻
愔愔我欲眠，自愛吾廬堪小隱。不須惆悵杜樊川，柳色云
飛絮。飛花一萬枝，白門紅板總相思。夕陽掩映秋千院，殘
月蒼涼柳七祠。近水易迷漁子權，隔林遙認酒家旗。風前
且自開眉黛，莫向離亭管別離。

小羅浮草堂詩集欽州馮魚山比部

敏昌

著嶺南羣雅載比

部性篤孝友，學務力行道。德粹然爲人，倫模範非特以詩
傳者。而詩筆雄深雅健，實足籠罩一切。巍然爲嶺南一大
宗。蓋天姿既超，又沈酣古籍，穿穴百家。由昌黎蘇黃上窺
李杜堂奧，乃自具鑪冶，獨開生面。其才富其氣盛，其聲正

以大其骨蒼以勁中年徧遊五嶽足跡直抵長城凡夫名山大川雲烟變滅波濤起伏之狀盤礴胷次而注於筆端益渾渾浩浩包孕萬象諸體靡弗擅勝而七言古陽關陰闔海涵地負嘆觀止矣粵詩自曲江後一振於南園再振於海雪藥亭獨漉湟溱諸公以迄於今其力追正始凌轢前詰以弁冕百餘年來風雅羣英者非先生其誰與歸余謂嶺南自三家而後黎二樵之奇鬱馮魚山之渾浩足以雄視萬古魚山七古多長篇鉅製美不勝收其唐子畏摹趙文敏馬九十三匹極縱橫變化之奇大禹廟六十韻雄深博麗可覘梗概唐子畏摹趙文敏馬九十三匹爲徐明府仰之題云子昂畫馬真權奇文人妙筆非畫師三百年後江南客復有子畏工文詞文詞繪事俱第一信是風流

才子筆平生趙馬幾追蹤最有斯圖稱入室九十三疋如
雲烟疎疎密密相後先驕驄駮耳不復辨令人想見分屯
年一人前進牽二疋二疋肩隨五疋立中間五疋來堂堂
更有黃馬當中出此馬顧步何安舒不落羣後不爭駮奚
官給頭初試步似待使君留駕車復有四疋行小後更有
廿疋馳且驟一疋滾塵五共槽一疋聲鳴鵝鶴高四疋圓
顧一疋望未免心留芻豆上怒者三疋蹄齧驚喜者四疋
交嘶鳴九疋不喜亦不怒行眠坐起循其故向後相隨十
四馬八駿之儔六駿亞最後五疋來何遲五花二疋雄殿
之就中駒兒數有七毛骨成立定逐日可憐諸馬應天精
行地真看萬里程千金欲購嗟無益百疋何妨尚未成獨
惜斯人貌斯木材具雖奇身坎壈可中亭上舞天魔何似

玉堂承旨近使君牧民求牧理害馬皆除爲政美黃堂五
馬看一驄白面專成佇千騎構才惜畫匪無因坐客題詩
共有神慚無杜老丹青筆但非尋常行路人夏縣謁大禹
廟敬賦六十韻云天地初誰做憂勤在至人祇台還陟后
丕績信由神尙想懷山日難將息壤陘魚頭看鷖鷖鳥足
但踐踐荒度知承帝焦思本嗣親元祇方感格蒼昊轉彌
綸遂有隨刊蹟真勞律度身娶纔過癸甲佐乃併庚辰萬
古龍門矗千尋砥柱涇經營煩尾畫憑怒更雷震九曲遙
流海三峯遂擘秦轅轅奚越板坵土自乘輻宛委藏宵闕
支祁鑿竟馴陣雲衡岳望玉牒水官陳加璧祠教痊燔柴
禮用禋厓看摩岫嶼築并泐岫嶼體勢迴鸞鳳光芒耀火
鶉大文彌億劫遺刻炳千春已信川原滌綠規壤賦均淮

璫包橘柚泗上貢珠璫華袞彰天繪元圭錫帝珍平成功
永賴彌直契誰鄰神佑焉枚卜人謀早博詢一中仍得統
二聖遂傳薪政以時爲大民將物共新山連爰首良斗建
正逢寅寶鼎愁魍魎神龜敵鳳麟圖成協休德疇衍叙彝
倫拜憶冒言喜甘因旨酒噴裔延過四百苗固祇三旬汲
汲甯湯導巍巍且舜均非常人所異無間道斯純茲土原
安邑維初立帝闡中條開奧室鹽海注藏緡想像梯航入
從容道路遵卑官崇儉後服枯劾忠晨信矣爲民極於焉
盛國寶一從徵夏諺遙爲舉南巡玉帛塗山會封壇霍鎮
臻車專會異骨舟負任黃鱗馭辨登仙域驂騎上紫辰穴
奇留窆石陵古斤金銀松磴重巒表梅梁舊水濱慕思餘
詰嗣瞻仰遍羣臣更有青臺築從知望女辛攀應愁翠栢

淑或灑叢筠風雨來於越波濤上高津飄飄歸故國瞻顧
撫遺民祠廟今彌煥笳簫日更振餘風猶渾樸習俗尙忠
淳自我遊并冀遐觀秣道榛河奔過洛汭山斷引梁岷劉
子言良信商高術待伸馨香隆俎豆瞻拜蕭冠紳祇願分
陰惜誰當亥步因臯繇疑擁篲柏翳況扶輪側想培元化
端居峻玉真安瀾還有慶沛澤總無垠厚土誠同載高穹
自比仁茫茫彌九域長此荷陶甄

嶺南羣雅載番禺張南山句警鍊異常如白草雙鷗下黃雲
萬馬穿河聲驅落日山勢壓全徐馬頭明曉月人面凍春
霜哀樂中年味關河獨客心天生我輩書爲命身在人間
骨欲仙江聲欲訴南朝事雨勢全沈北固山泰山霞氣天
雞曙易水風聲塞馬寒暮禽有意欲留我老樹無言多閱

人雨深草與人爭地風急雲如水潑天心依骨肉常多夢
身急功名易損才肝膽只宜明月照性情先被古人知

香山黃子實副貢

培芳

嶺海樓詩鈔詩境冲曠與陽春譚康

侯孝廉

敬昭

番禺張南山太守稱粵東三子嶺南羣雅謂

貢士性恬靜然聞登臨攬勝輒神動色飛嘗三遊羅浮於
絕頂築粵嶽祠以觀日出自號粵嶽山人又以前人志羅
浮者多詳於羅而畧於浮乃作浮山小志以補其闕於攀
崖躡磴時用心縝密如其詩亦緣是益進蓋山水清音
兼有琴筑鐘鏞之奏冲和胎宕旨趣遙深矣望羅浮飛雲
頂云飛盡千峰雲突兀矗天外浩浩元氣通上與真宰會
作鎮雄百蠻翕闢仙境大偉哉盪吾胸騁眺入青靄戊辰
歲暮重遊羅浮之四云我欲飽看雲天公催作雨芬鬱彌

萬壑變態紛可數如翻渤海濤忽曳長天組一峯作蠶頭
一峯倏露股雲生旋雲滅峯峯互吞吐雲中誰往還隱隱
聞天語願隨雲中君飄然事高舉贖人行云海盜船動
盈百東西南北候過客相逢礮火聲轟天萬衆齊呼飛過
船人人土色心膽裂短刀交下白如雪盡掠財物兼捉人
捉人上船佯怒嗔奴顏囚首見板主賊首稱號板主頭裹紅羅
巾貧富詰罷各乞命千金百金贖一身大呼紙筆作細字
索取百物限淡旬逾時不贖剖腸腹速寄家書歸至親典
衣貨產并哀貸拮据措置潛悲辛遣人入海與交易但得
再活甯論貧更有細民居海畔日日驚惶四逋竄夜匿荒
山洞裏眠晨歸破屋茅中爨盜船惟向炊烟來奔逃不及
遭羈絆老父留贖兒放回速賣耕牛數虧半含啼鬻子僅

取盈老父歸來苦家散人亡財盡四壁空不死克殘死因

窮君不見兵船西盜船東兵船候潮盜船乘風兵懦或退

避盜衆還相攻不恨兵船不得利但恨不見黃總戎謝黃公標

題酥醪觀小樓云仙人好樓居而羅浮頗妙精構道人江

勝余顏曰浮山第一樓酥醪故葛洪北菴昔安期生與神女觴此羅山踏遍少樓臺洞入

酥醪傑構開萬壑雲烟浮檻出半天松竹拂窗來稚川此

地曾高卧神女何年更舉杯我且置身高百尺憑欄清嘯

動林隈自酥醪觀出山是晚至增城云壺天小住雨絲絲

候得新晴出洞時流水亦知遙送客名山難定再遊期千

峯高處行偏健百里歸程去獨遲晚抵增城殘照紫瓣香

還展菊坡祠倚山樓夜起云樓倚雲根結構牢秋林夢醒

夜蕭騷百蟲漸響萬峰寂自起開牕山月高贈徐又白青

云看山曾共宿雲扃吟向山樓爾獨醒筆似韓公貌東野
近來詩客愛徐青

詩有篇法極佳當刪累句者刪之則爲完篇不刪則成蛇足
建甯張亨甫江山船曲末十二句必刪之方成完璧今錄
其全詩云烟波日悠悠悠悠見衢州儂家江山船灣在西
門頭船頭紫檀香船尾白沙棠紅艚捲翠幙白晝多輝光
衣裳照江水誰家好郎子莫欲去蘇杭儂船好無比郎來
且安息爲郎悅顏色儂家同年妹同年者桐嚴之譌耳世上難再得
江上好花開鴛鴦成雙來阿姊彈錦瑟阿嫂勸金壘錦瑟
一聲聲汀風都有情鴛鴦不肯去飛上船頭行至此作結
較見有餘不盡之意篇法亦自渾成乃末復接以五日蘭
谿口十日桐廬首七里灘中魚更貴紹興酒布帆緩緩去

姊妹如泥絮纏綿留不住半月到杭州江邊風飄飄江上
花搖搖妹爲八月節卽作錢塘潮此十二句豈非蛇足乎
金匱徐朗齋孝廉嵩著有玉山閣詩稿四卷其詩逸藻古豔
擅青蓮昌谷之長孝廉少歲卽游秦隴兼涉伊涼故作者
清激中時露奇響其五言古卽事云把卷臥疎雨雨斷夢
亦斷不知簾外風吹我卷帙亂濕雲互明滅庭柯夕陽半
屋角一帶山晴翠落几案忽聽幽鳥嘯餘花捲書幪霽云
微雨明殘虹涼飈先秋樹修廡耿清影月在樹深處織女
蓬萊車迢迢綠雲路懸勳舊錦機因風駛烟霧塞上云龍
荒雲陣黑大漠平沙日羌管一聲高天山初落月七古憶
海棠云海棠花發春方酣海棠花裏思江南好花如畫復
如夢五千里外春風動高高樓子上碧天樓中人與花同

年紫絲紅錦翠屏小不解相愛知相憐春風冷翦春雲燕
粉鏡粧成折枝血夜長燭短睡無聊月澹露濃嬌沒骨懊
花却鎖樓上頭東風怨入西風愁慙魂怨魄春如線雨脚
絲絲烟片片好花可惜誓不攀萬度相思一圓見恨殺無
香勝有香見時苦短別時長怕他化作傷心草秋海棠花
更斷腸膠雀行云中林蒙茸萬雀來呼羣飲啄飛低徊一
人垂頭疑佞手出長竿穿樹後十指不動如枯枝舉竿
就烏鳥不知魚膠百鍊蠻絲毒一點竿頭毛翼觸層層綠
葉花亂飛那識美蔭成危機寄聲黃口慎出入不獨野田
羅網密宿江上云朝行空江中暮宿空江裏江頭一痕山
日入化烟水波心月出天蕩搖欲上不上知天高大魚噴
沙作飛雨白鳥上樹如驚濤櫓聲呶啞襍鳴雁人語衝寒

不能辨穿蘆燈影明萬條接舵水紋明一線漁歌入夢心
四飛忽復夢斷歌仍微舟人搖客夢中去魂在橫江醉吟
處五言律九龍山晚歸云行行出翠微一徑入斜暉黃葉
有時落白雲何處飛溪長虹暈斷稻熟螿匡肥欲采芙蓉
晚煙瀾隱釣磯崆峒道中云崆峒太古色瑩确斷人行野
水背城走寒橋帶雪明陰陽催短至車馬畏長征擾攘風
塵苦何年問廣成夜云夜色澹無寐小窓松鶴羣彈琴滿
牀月滌硯一池雲蕉葉亂書影桐華灑簟紋恐成幽獨恨
深坐水沉熏采蓮曲云江頭采蓮子心苦見蓮稀攀花恨
刺手搖花亂濕衣回船淺藻滑打槳鴛鴦飛日落江雲起
能乘逆浪歸回次金山云淹迹三年久鄉關望轉迷江還
京口濶天入海門低身世孤舟裏漁樵落照西淒涼六代

恨水寺聽潮雞黃浦云出郭日沉景歸鴉飛繞城驛樓連
海氣神廟走江聲舸艦衝飈集黿鼉負浪行波濤難逕渡
世路客心驚渡江同從兄云江上雁飛月北風行未休窮
陰連去馬積雪擁征裘古木森當路寒山亂入樓辛勤殘
歲事衣食苦滄留山夕云草蟲門徑遠一路入谿烟月滿
無人地鐘殘有雁天心孤聞動竹衣冷近流泉欲覓鄉關
夢樓空獨上眠七言律清明偕方子雲汪劍潭沈春林畢
靜山登吹臺云清返東流牧澤開踏青草草上繁臺梁王
簫管平蕪靜魏國雲山返照來四海飄零懷李杜千秋賓
客有鄒枚未妨舒嘯成高詠書劍中原到幾回落葉云一
夜微霜凋碧林年華歲晚暗相侵幽衾酒醒重簾遠孤館
燈昏細雨深身世飄零遷客路江關搖落故園心何須更

製哀蟬曲祇恐天涯想不禁上元夜云銀鑪香燼月輪移
蓮箭金壺滴漏遲別院笙歌懷舊事上元燈火憶兒時故
園棣柳疎書札歸夢江湖入鬢絲記得紫簫雙鳳曲幾回
殘醉隔花枝

絕渡太湖云載酒吹簫汎畫艤垂虹西角是吳江坐收三
萬六千頃七十二峯青一窓自閉絕句云白下風流梁四
家閉門春女老琵琶子絃彈破紅窻月簾外新開穀雨花
冶春云水瀟桃花小鴨嬌波光入影上平橋橋頭一片春
山色楊柳青於昨夜條製就玲瓏紅鬪絲東風花落剪刀
遲芙蓉衫子裁新樣多恐腰肢減舊時那臺題壁云書劍
飄零酒一杯西風斜照古那臺不須慷慨題殘醉恐有人
從燕趙來題張憶嬾簪花圖豔絕簪花賦窈窕春風零落
粉痕香是誰描取輕鸞影一幅丹青一畝腸警鶴輕蟬謝
綺羅過雲無復舊時歌祇應畫裏橫波日曾見江南老輩
多五言句如孤花含暮雨殘笛隱秋潮鄉樹橫雲外春江
細雨中關河風雨夜火弟兄心帶水分秦晉斜陽澹古

今人遊青嶂外我愛白雲深劍明疑有月香細欲生雲七
言句如醉來舊事關心事人入中年憶少年千載銷魂惟
有別十分愁豔不成詩好懶晚霞烘落日欲拚沉醉笑春
風却嫌春恨銷難盡欲問天台路未通華嶽雲烟朝暮改
崑崙河水古今流瀑過佛頂驚僧夢葉落花臺醒鶴眠嶺
樹雲移青到地松巒石破碧摩天數竿修竹紅藏寺幾樹
垂楊絮到門蟲沙變幻成今古鋒鏑消沉起物華水面風
來寒欲雨巖腰雲斂晚初晴浮名也抵腰懸綬歷卷新排
手訂書五更霜月欺燈影一樹風鴉續雁聲寒浦帶星垂
似露夜風吹月動如沒愁年不共生年短死日方知別日
佳烟中紫燕相離語霜裏紅渠獨自花住久小樓因對嶺
斷來清夢又無家寒天細竹人孤倚斜日空檐燕對飛